



16. august 2012

UKA 2012/158

Inatsisartut suleriaasianni § 33 naapertorlugu aalajangiiffigisassatut siunnersuut imaattoq saqqummiuppara:

**Naalackersuisut UPA 2013-imi Kalaallit Nunaanni suliffeqartut akornanni inuit qanoq amerlatigisut nunat avannarliit avataaneersuunerat pillugu kiisalu suliffeqarfinni sorlerti taakku nalinginnaasumik sulisuunerat pillugu nalunaarummik saqqummiusseqqullugit Inatsisartuni aalajangiiffigisassatut siunnersuut. Nalunaarummissaaq inunnut taakkununga sulinermi atorfeqartitaanermilu pissutsit suut Kalaallit Nunaanni suliffeqarnermi neqeroorutigineqartarnersut kiisalu pissutsit taakku pisut ilaanni atugassarititaasunit ajornerulersitsinermik kinguneqartarnersut ilanngullugit saqqummiuteqquneqarput. Nalunaarusiaq suliniutaalersussatut kaammattuutinik naggaserneqassaaq.**

(Inatsisartunut ilaasortaq Akitsinguaq Olsen, Siumut)

**Tunngavilersuut:**

Suliffeqarnermi pissutsit pitsaasumik aaqqissuunneqarsimanerisa qulakkeernissaat pingaartuuvoq, taamaalilluni sulisartut nunanit avannarlerneersuungitsut eqqortumik kiisalu nunatsinni aaqqissuussinitsinni maleruagassat atuuttut naapertorlugit sullinneqarsinnaaqqullugit. Nunat aningaasaqarnikkut siuarsimasut pisuullu allat assigalugit Kalaallit Nunaat nunanit ineriartorfiusunit inunnik maani sulillutillu inuuniarnermikkut atukkaminik pitsanguinissamik kissaateqartunik tikinneqartarpoq. Suliffeqarfiit sullissinermik ingerlatsisut, amerliartortunik sulisoqartut akulikinnernik nunat avannarliit avataaneersunik sulisoqartuusut<sup>1</sup> matumani assersuutissaqqinnerusutut taaneqarsinnaapput.

Nunat avannarliit allat assigusunik ajornartorsiuteqarput, taakkulu suliffeqarnermut pissutsinik suliffeqarfinniullu kiisalu suliffeqarfinnik naalagaaffinnit aningaasalersorneqartunik siumut nalunaarutqaqaarnani suliarortunik avataanersunik, ilaatigut Europap kangianeersunik sulisoqarnersoq kiisalu taakku eqqortumik atugassaqartinneqarnersut kiisalu suliffeqarnermi malittarisassanik eqqortitsisoqarnersoq pillugu misissuisarput. Nunatsinni sulisartut kiisalu piffissat suliffissatut aalajangersakkat aammalu sulisoqarnermi pissutsinut maleruagassat allat ammip qanoq qalipaateqarnera tunuliaquttallu apeqqutaatinnagit innuttatsinnut eqqortinneqartariaqarput, uani nunaqavissuuneri imaluunniit nunat avannarliit avataaneersuuneri apeqqutaatinnagit.

Nunatsinni ullumikkut suliffeqarfiit namminersortut pisortanillu pigineqartut siuliani taasanik misissuinissamut akiliinissamullu pisussaaffeqartinneqarput. Naalackersuisut nunatsinni sulisartut nunat avannarliit avataaneersut eqqortumik sulitinneqarnersut kiisalu sulisoqarnermi pissutsinut

---

<sup>1</sup> Kalaallit Nunaat nunallu avannarliit allat isumaqatigiissutinik arlalinnik, innuttamik nunartik qimallugu nunani avannarlerni allani sulinerini inuuniarnermikkut aningaasatigullu pisinnaatitaaffinnik imaqartunik isumaqatigiissuteqarput. Nittartakkami qupperneq una alakkaruk: <https://www.norden.org/da/om-samarbejdet/aftaler/aftaler>

maleruagassat sakkukillisarneqannginnerannik aammalu pineqartoq pillugu nakkutilliinerup qanoq innera pillugu nalunaarusiornissamik peqquneqassapput.

**Pisortanut aningaasatigut allaffissornikkullu kinguneqaatit:**

Nalunaarusiap allaffissornikkut suliarineqartusaanera kingornalu nalunaarusiap attuumassuteqartunut tusarniutigineqartussaana pissutigalugu, siunnersuutip siunertaanik piviusunngortitsineq Namminersorlutik Oqartussat allaffissornikkut isumalluutinik atuinissaat kingunerissavaa. Nutserinermut suliamillu ingerlatsinermut il.il. tunngatillugu aningaasatigut isumalluutinik atuisoqassaaq. Ataatsimut aningaasartuutit annerpaamik ukioq ilivitoq sulisitap 250.000 kr-inik naleqartup affaanit minnerussasutut missingerneqarput.

**Innuttaasunut kinguneqaatit**

Siunnersuut innutaasunut kinguneqaateqassagatinneqanngilaq.

**Namminersorlutik inuussutissarsiortunut kinguneqaatit**

Siunnersuut namminersorlutik inuussutissarsiortunut kinguneqaateqassagatinneqanngilaq.